



Le Mazarin portant la hotte dit: J'ay bon dos, je porteray bien tout.

<https://hdl.handle.net/1874/362747>

fe
LE
MAZARIN
PORTANT
LA HOTTE,
DIT,

J'ay bon dos, ie porteray bien
tout.



M. DC. XLIX.

THE
MARRIAGE

PORTANT

LA HOTTÉ

DIT

donc pour le porteur bien

TOUT

M. DC. XLIX

LE MAZARIN PORTANT LA HOTTE
dit, Iay bon dos ie porteray bien tout.

MA foy tout le monde s'abuse
Alors que la France m'accuse
De cent maux que ie n'ay point fait,
Ie suis innocent en effet,
Quoy que Prouinces soient en armes,
On dit mesme que i'ay des charmes
Pour corrompre tous les esprits :
C'est le subiet de tant d'escrits
Dont Colporteurs font tant de conte,
Et souuent ie rougis de honte
Lors que i'entens ces vains propos ;
Mais ie veux porter tout, car ma foy i'ay bon dos.

Il n'est rimeur dans sa colere,
Il n'est point fils de bonne mere
Qui ne me blâme en bonne foy
Des crimes qui sont hors de moy,
Chaque Marchand dans sa boutique
N'ayant plus si bonne pratique,
En iazant au premier venu,
Dit d'un accent tout ingenu,
Il faut croire que l'Eminence
A mis au net toute la France,
Elle se perd de bout en bout ;
Mais ma foy i'ay bon dos, ie porteray bien tout.

Le Vigneron lors que l'orage
A fait desordre au paylage,
Me fait l'auteur de tous les maux,

Si l'on voit desborder les eaux,
Chacun s'en prend à l'Eminence,
Qui souvent à nul mal ne pense,
Qui jamais à mal n'a pensé,
Qui n'a pas encor commencé,
Vinant dans la pure innocence,
Quoy qu'on dise autrement en France,
Ce qui vient troubler mon repos;
Mais ie veux porter tout, car ma foy i'ay bon dos.

Les peuples, les Areopages,
Les fols aussi bien que les sages,
Se font portez auueglément
A m'accuser iniustement
Du moindre mal qui les offense,
Le Nautonnier prend la licence,
Quand il void la mer en courroux,
Et le pauvre planteur de choux
Voyant son lardin sans rosée,
L'Eminence en est accusée,
Et i'entens tous ces beaux propos;
Mais ie veux porter tout, car ma foy i'ay bon dos.

L'Aduocat qui n'a dequoy frire,
N'a de pensée que pour mesdire
Contre le pauvre Mazarin,
Et ie croy mesme que Varrin
Au lieu de battre sa monnoye,
N'ayant pas trop le cœur en ioye,
A fait libelles contre moy,
Ainsi ie le pense, ma foy,
Et dans ces papiers que l'on crié,
On dit que i'ay dans la Patrie
Allumé le flambeau par tout;
Mais ma foy i'ay bon dos, ie porteray bien tout.

On me nomme avec infamie,
 Toute l'Europe est ennemie
 Du beau nom qu'en naissant i'ay pris,
 Et ie sçay que les bons esprits
 Font de mon nom leur raillerie;
 Ie sçay que gaigne petit crie,
 En traissant tout son reuenu,
 Contre moy à luy inconnu,
 Et qu'il n'est lieu dessus la terre
 Où l'on ne m'ait liuré la guerre,
 Soit par le fer, ou par des mots;
 Mais ie veux porter tout, car ma foy i'ay bon dos.

Chacun vient censurer ma vie,
 De toutes parts ie voy l'enuie
 Qui dans mille vilains portraits,
 Des crimes que ie n'ay point faits,
 Ont terni ma iuste louange,
 Ils ont fait vn demon d'vn Ange,
 M'ayant mis cornes sur le front,
 Il est bien vray que cet affront
 M'a fait mediter la vengeance
 Qu'on doit prendre de cette engeance
 Qu'autrefois on nommoit Badauts;
 Mais ie veux porter tout, car ma foy i'ay bon dos.

I'entens par tout que chacun crie,
 Il faut ietter à la voirie
 Ce franc maraut d'Italien,
 Qui vient de gripper tout le bien
 De la France qu'il vient d'occire:
 Hal ma foy c'est vn mauuais sire

Qui sçait escorcher le François,
 Aussi sans en faire à deux fois,
 Ne faut il pas qu'en pleine Greue
 Le bourreau promptement l'esleue,
 Voila l'entretien de ces sots;
 Mais ie veux porter tout, car ma foy i'ay bon dos.

Souuent de mes propres oreilles
 I'entens qu'on me chante merueilles,
 Mais cependant telles chansons
 N'ont rien des agreables sons
 Qu'en faueur de ce grand Ministre,
 Qui fut bien moins que moy sinistre,
 Apollon dessus ses sommets
 Faisoit ouyr en temps de paix,
 Car i'entens qu'avec Eminence
 Le Poëte a fait rimer potence,
 Et desia ie pense estre au bout;
 Mais ma foy i'ay bon dos ie porteray bien tout.

Quand ie pense trouffer bagage
 Ie rencontre dans mon voyage
 Messieurs les vents, & les lutins,
 Qui pour moy font plus les mutins
 Que l'on n'en fit és barricades,
 Dont le souuenir rend malades
 Tout ce que i'ay de Partisans,
 Qui ne sont pas guerriere gens,
 De Financiers toute la troupe
 N'est vaillante que sur la soupe,
 Ou quand il faut leuer impos,
 Et i'ay tous leurs pechez chargez dessus mon dos.

Chacun est fait au badinage,
Il n'est en Cour Laquais ny Page,
Qui pour vn demy quart d'escu
Ne me fichast espingle au cu,
L'estime mesme que Nerueze,
Qui n'est pas des plus à son aize,
Quoy qu'elle ait de moy pension,
Tesmoigneroit sa passion
Contre moy que personne n'ayme,
Si ce n'est peut-estre moy-mesme;
Mais il faut souffrir tous ces maux,
Et pour les porter tous, ha! ma foy i'ay bon dos.

FIN.

OCW 65 232 150

[Faint, illegible text, likely bleed-through from the reverse side of the page]

FIN